

續文獻通考


四十八之九

八	一	二	漢書門
一	三	四	
三	三	一	
架	函	號	類

五	二	漢書
四	四	
函	八	
一	三	
三	一	
架	冊	號
類		


內閣文庫	
番號	漢 2431
冊數	81 (17)
函號	294 13

選舉



賢良

童科



續文獻通考卷之四十八

淺草文庫

皇明進士雲間王圻纂輯

選舉考 薦舉

宋

理宗寶慶元年詔舉賢良之士 淳祐十年詔舉制科

景定二年詔禮部國子監以有出身人附銓試場應詞


學科照嘉熙二年例行之

度宗咸淳二年太傅陳壽孫乞太學增試宏詞科是時王

應麟應鳳皆與選

真德秀奏舉遺逸趙蕃其畧曰臣等伏讀嘉定八年九

月辛未明堂大禮赦書內一項士人有節行才識學術



素爲鄉里推重不求聞達者委監司帥臣同加搜訪每
路一二人仍與本州長吏具從來所爲事實所通學術
連銜結狀保明聞奏卽不以常才脩數委三省再加察
訪如所舉不妄特與擢用仰見聖朝網羅遺逸之意臣
等朝夕博訪期所以稱塞明詔之萬一竊見文林郎監
潭州南嶽廟趙蕃元祐故家學有源委識慮深遠節操
清高蚤歲得官臨事有立年踰四十卽上詞請隱居求
志垂三十載矣安貧處約澹然無營少工于詩晚益平
淡身雖閒退而愛君憂國之念未嘗少忘其在州里誘
掖後進一以孝弟忠信爲本蕃雖名在吏部然其行誼
學識素爲鄉曲所推不求聞達正應詔旨臣等旣深知

其爲人又其家居適在所部庸敢輒以名聞伏望朝廷
更加察訪如臣等所舉不妄卽乞特加旌擢以勵士俗
其於世教蓋非小補

衛涇奏舉布衣胡大壯其狀曰檢準嘉定五年近降指
揮方今收用人才非止一途然山林畎畝之間懷德抱
道不求聞達者豈無其人願俾監司守臣博加採訪具
以名聞無爲文具臣濫分符閫遠在湖湘欽承德音廣
求精選伏見潭州衡山縣布衣胡大壯故實文閣直學
士謚文定安國之孫右承務郎宏之子也抗志高遠制
行介潔自其少時已著孝友之稱旣長受其祖安國之
學於父宏研究經術博通墳典其持論以明義利爲本

其立已以尚誠實爲要冠歲學成即不事科舉隱居衡
嶽之下躬耕自給讀書自娛爵祿外慕一毫不以嬰其
心深藏固匿足跡未嘗至城市州縣官必禮於其廬然
後得見於是行成於身理於家信於鄉黨達於遠邇邦
人敬愛咸慕其道德尊之曰西園先生平生著述雖多
而封建論數篇尤爲先達推重近時如前帥臣曹彥約
提舉樂章咸嘉其行相繼刻上本州以嶽鹿書院堂長
虛席嘗遣官吏以禮延致至今力辭未就臣觀其學識
節行足以師表後進蓋亦古之所謂逸民也臣竊聞孝
宗朝嘗有詔舉遺逸於是福建諸司芮燁等以魏拔之
之名來上則拔之自布衣召對賜第命爲學官又嘗與

監察御史謝諤論郭雍之學皆本於易則雍自冲晦處
士加封頤正先生此皆近事彰彰在人耳目者矧自陛
下更化以來動遵孝宗成憲欲望聖慈特降睿旨下之
三省斟酌典故將大壯量才褒錄或畀之一命而授以
在外學官之職或錫之綸誥而假以處士之名庶幾山
林巖穴之棄材悉爲特用可以仰副陛下求賢致化之
意

按浙江通志杭州錢易錢彥遠紹興夏噩錢宇之温州
王景山陳寶之何勝實劉天益則以賢良方正直言極
諫舉杭州錢明逸錢藻李尚則以才識兼茂明于體用
舉杭州李鞬温州王邵薛嘉言謝任鮑軻陳龜朋陳峴

處州王大方湯思退則以宏詞舉杭州陸邵之紹興王
俊則以詞學兼茂舉寧波王璧王應麟王應鳳紹興石
慶許蒼舒邢宜莫叔光岑全章一新錢揚祖徐執台州
趙許金華許存禮徐淵則以博學宏詞舉紹興胡太初
孫嶸岑賢孫則以詞學舉寧波縵師臯慶州葉昶王信
鄭汝諧項安世劉澹然則以教官舉湖州沈友直劉嶠
周別温州仰沂丁蕪夫張輝方燁蔡元康潘安固朱敏
切處州祝頰則以八行舉紹興張子俊張玘陳仲淳沈
信年張遜王蘭韓啓呂諒呂璠温州孔夢斗陳中庸萬
規處州徐仲吳銘則以經明行修舉朱戩胡混王弘顧
臨金華鄭祥徐佺趙崇俊應孟堅甘霖陳夢履徐玘則
以明經舉而童子科又在外

遼道宗咸雍六年設賢良科詔應是科者先以所業十萬
言進 十年六月御永安殿策賢良

天祚帝乾統二年閏五月策賢良

金章宗大定二十九年上封事者乞鄉以八行貢春官設
制舉宏詞事戶部尚書鄧儼等謂成周鄉舉里選法卒
不可復設科取士各隨其時八行者乃亡宋取周禮之
六行孝友睦婣任恤加之中 和爲八也凡人之行莫大
于孝廉今已有舉孝廉之法及民有才能德行者令縣
官薦之又制犯十惡奸盜者不得應試亦六德六行之
遺意也夫制舉宏詞蓋天子待非常之士若設此科不

限進士并選人試之中選擇之臺閣則人自勉矣上從其議 明昌元年三月初設應制宏詞科 二年設制舉有賢良方正能直言極諫博學宏詞達于從政等科試無常期上意欲行即告天下聽內外文武六品以下職官無公私過者從內外五品以上官薦于所屬詔試之若草澤士德行爲鄉里所服者則從府州薦之凡試則先投所業策論三十道于學士院視其詞理優者委官以群經子史內出題一日試論三道如可則廷試策一道不拘常務取其無不通貫者優等遷擢之宏詞科試詔誥章表露布檄書則皆用四六誠諭頌箴銘序記則或依古今體或參用四六于每舉賜第後進士及在

官六品以下無公私罪者在外官薦之令試策官出題就考通試四題分二等遷擢之後衛紹王大安元年五月試宏詞科餘不多見其除官上等遷兩官次等遷一官臨時取旨授之 承安二年三月始定保舉德行才能格 泰和元年上謂德行才能非進士科所能盡可通行保舉之制省臣奏在周禮大司徒以鄉三物教萬民而賓興之所謂萬民士農工商皆是也前代立賢無方如版築之士鼓刀之叟垂光簡冊者不可勝舉今草澤隱逸才行兼備者令謀克及司縣舉按察司具聞以旌用之既有已降令文矣上命復宣旨申之

元

世祖至元十八年詔求山林隱逸之士 二十三年遣侍
御史程文海訪求江南遺才 二十八年復詔求隱晦
之士俾有司具以名聞 時徵劉因爲集賢學士辭不
至因字夢吉容城人前徵爲右贊善大夫尋辭歸至此
復徵之因以疾固辭帝聞之曰古有所謂不召之臣其
斯人之謂歟遂不強致之

胡粹中曰劉因風節與嚴光相似然子陵羊裘釣水過
爲殊絕之行加足帝腹又失人臣之禮峻厲峭直不可
以爲法而靜修聞命即拜受任則辭進不失義退不違
禮卑不可踰高不過抗從容自然得賢人之高致者也
尚論元世遺逸靜修一人而已

世宗大德八年五月徵蕭巖赴闕命有司給以安車駟在
世祖時授陝西儒學提舉不赴累授集賢侍讀學士皆
不赴至大德十一年拜太子右諭德扶病入覲尋請去
職曰在禮東宮東面師傳西面今可行乎俄除集賢學
士國子祭酒固辭疾歸 九年詔求山林間有德行文
學識治道者

武宗至大四年完澤李孟等言方今進用儒者而老成日
以凋謝四方儒士有成材者請擢任國學翰林秘書太
常或儒學提舉等職俾學者有所激勸上曰自今勿限
資級果才而賢雖白身亦任用之

仁宗延祐元年正月勅各省平章爲首者及漢人省臣一

負專意訪求遺逸苟得其人先以名聞而後致之 七年詔曰比歲設立科舉以取人才尚慮高尚之士晦迹丘園無從可致各據其有隱居行義才德高邁深明治道不求聞達者所在官司具姓名牒報本道廉訪司覆奏察問以備錄用又屢詔求言于下使得進言于上雖指斥時政並無譴責往往采擇其言任用其人列諸庶位以圖治功其他著書立言裨益教化啓迪後人亦斟酌錄用著為常式

英宗至治三年拜住言前集賢侍講學士趙居信直學士吳澄皆有德老儒請徵用之帝喜曰卿言適副朕心更當搜訪山林隱逸之士遂以居信為翰林學士承旨澄

為學士

泰定帝二年九月遣使宣撫諸道有晦迹丘園才堪輔治者具以名聞

文宗至順二年七月特命河南儒士吳炳為藝文監典籍順帝至正二年徵處士脫因伯顏張瑾杜本惟本不至本在武宗時常被召至京師即歸隱武夷山下文宗聞其名徵之不起至是脫脫薦之召為翰林侍制兼國史院編修官使者趣至杭州稱疾固辭且致書丞相曰以萬事合為一理以萬民合為一心以千載合為一日以四海合為一家則可以言制禮作樂而躋帝王之盛矣七年正月召隱士完者圖執禮哈琅為翰林侍制張樞

董立為翰林修撰李孝先為著作郎張樞不至 十二年二月徵建寧處士彭炳為端本堂說書不至 十五年召徽州隱士鄭玉為翰林侍制不至

許約曰科舉之法實始于隋唐後世因之而科舉益盛然科舉與辟舉之法並行故唐之人才為盛然房杜裴郭諸公未必盡出于科目也宋起孫明復于泰山而處之胄監拔蘇洵于眉山而進之容臺擢程頤于西洛而實之講筵所以尊尚有德自足以聳動天下而人才之盛職此之由若罷薦舉獨行科舉之法命有司以防奸欺設邏卒以檢懷挾功名之士不拘小節固不以為嫌彼恬退高蹈之士必不屑就大抵科目固足以得士亦

豈能盡得天下之賢中人以下之資可以利誘若學際天人道全體用者安肯決榮辱于三場競是非于寸晷哉當于科目之外別立薦舉之法若學行兼備肥遯林泉不求聞達不屑科目者聽所在保舉待以不次夫如是不徒有以獎拔恬退而野無遺賢之美溢於唐虞矣元時以徵授官者劉因蕭軒吳澄之外尚有數人

許衡 中統間徵授懷孟路教官

李治 中統間徵授翰林學士

趙孟頫 至元中以程文海薦擢兵部郎中

徐琰 至元中以王磐薦拜浙江肅政廉訪使

趙宏偉 至元中以董士桓薦拜浙江廉訪使

袁楠 大德間以閻復程文海王溝薦為翰林檢討

按浙江通志元徐元德胡崖以賢良方正直言極諫舉皆金華人

皇明

國初令有司保舉人材即古鄉舉里選之遺意 累朝下
詔亦必及之其事例備載于後

凡各府州縣每歲於所轄隅廂鄉都內拔選容止端謹
無過人材一名申送布政司考覈轉行按察司覆考堪
充歲貢開坐考過詞語差人送部應有賢良方正及山
林巖穴隱逸之士并通曉經書儒士秀才孝廉俱各訪
求到官審無過犯違碍不拘名數差人伴送到部或內
外官員人等薦舉人材秀才即便行移原籍官司起取
赴部如儒士秀才出題考試果否通經賢良隱逸等項
人材量其才能定其高下仍取本戶丁糧數目作何營
生及戶內有無雜役事故供結明白然後開發送部選
用如將鄙陋不堪之人一槩朦朧濫舉原舉官吏依貢
舉非其人律問罪

太祖洪武庚子六月遣使徵宋濂劉基章溢葉琛至金陵

帝問陶安曰四人者何如安曰皆臣所不及也 帝

嘉其善讓 元年九月 詔起懷才抱德隱于巖穴之

士遣夏原吉詹同魏觀吳輔趙壽等分行天下訪求賢

才 十一月癸亥以 手詔召劉基 二年十月以方

克勤爲寧海訓導克勤樂于育才負笈求從者甚衆克

勤據經陳義聞者悅服 四年閏三月 召永豐劉于

至初于嘗以賢良徵因病謝歸及是復召至便殿 諭

曰君子爲學當見於世用朕將官之于曰臣在前朝嘗應進士舉試南宮不利今幸逢有道之朝凡有氣血者咸思效用但臣年齒已衰恐負天恩敢辭特賜還山十一月召宋濂爲禮部主事六年五月命禮部訪求賢士於天下上曰古之聖王恒汲汲於求賢若高宗之於傅說文王之於呂尚二君者豈其智之不足而遑遑於版築鼓刀之徒實以天下之大非人君之所能獨理而賢才不備不足以爲治也今山林之士豈無德行文藝之有足稱者宜令有司以禮起送至京朕將任用之以圖至治是年罷科舉專用辟薦其目有明經行修有懷才抱德有賢良方正有人材有

孝廉鄉舉于朝而各省貢士皆卒業太學以次除用蓋罷進士之科者十有餘年時既不喜文士又以初立辟薦法行之甚嚴每舉者至京上親校閱不稱旨輒坐舉主往往有謫戍者至洪武十五年復開科今圖列諸狀元姓名有洪武九年張顯宗諫矣七年八月上御武樓宋濂侍問曰天下雖定朕猶垂意宿學之士卿知其人乎濂對曰會稽有郭傳者雖寄跡釋氏誠一代奇才也上頷之未幾復召濂曰郭傳之文卿可持至乎濂以其文進上覽之曰誠如卿言即召見俾日侍左右以備顧問傳精白一心凡可以獻替者咸無隱情擢爲翰林應奉陞起居注遷考功丞九年五

月 上御奉天門謂宋濂等曰自古有國家者必資賢才以共理秦之時張良陳平韓信皆隱屠釣漢興乃用以成帝業今山林巖穴豈無超拔之才何以能羅而致之濂對曰取士莫善於選舉用人莫善於器使命官莫善于久任 陛下行此則人才皆效用矣 十年九月

勅諭浙江温州府訪求師儒 十二年十二月 詔徵天下博學老成之士先是 上謂禮部曰爲國得賢不如薦賢朕自臨御以來十有二年思得賢士以熙庶績然博學老成之士匿德藏光甘於窮餓不肯輕出宜下有司悉心推訪禮送于 朝朕將顯用之至是皆至京師時江西布政使沈立本遣人招故元吏部侍郎伯

顏子中子中飲鴆死子中西域人祖父仕江西因家焉通春秋五領鄉薦授東湖書院山長陞建昌路儒學教授尋爲江西行省都事陳友諒兵陷贛州子中招募壯士欲復城不克間道入福建行省子中出奇計收復建昌遂浮海獻捷元都授福建行省郎中累遷至吏部侍郎出使廣東比至未幾而廣已歸附子中墜馬求死不得拆其一足於是子中變姓名浪跡於江湖間往來居進賢之北山先是其妻子已爲江西叅政楊憲送京師朋友有弔之者子中答曰吾身且不有奚暇顧妻子哉於是周游天下誓不復仕悲歌慷慨未嘗一日忘于元也嘗懷鴆自隨曰如有強我者便當以死答之郡縣聞

而義之不之強至是立本專使招之子中見使者慨然
曰吾今死亦晚矣乃具牲酒祭其祖父師友作歌七章
飲鳩而死 詔徵寧國府訓導陳迪爲翰林編修 十
三年二月 詔舉聰明正直孝弟力田賢良方正文學
術數之士 十五年九月吏部以經明行修之士鄭韜
等三千七百餘人入見 上諭之曰朕自即位以來側
席賢士與圖至治然自古知人堯舜所難豈所知者皆
賢所未知者無賢哉故 勅天下徵聘遺逸卿等固皆
賢人君子山林之下又豈無卿者其悉舉以爲朕用於
是濟寧單縣儒士張寧以董倫等薦復遣使徵之仍
賜韜等鈔人一錠 十一月徵者儒鮑恂等四人至京

師先是禮部主事劉庸薦鮑恂余詮全思誠張長年皆
明經老儒達於治體可脩顧問遣使召至 上見之喜
賜坐顧問 命爲文華殿大學士恂等以老疾固辭
上諭之曰以卿等年高故授此職輔導 東宮免卿
早朝日晏而入從容待對不久當聽卿等致仕庶不負
卿等平生所學卿何辭焉恂等復固辭尋 賜還鄉里
十七年令各布政司直隸府州縣舉秀才人材必由
鄉舉里選知州知縣等官會同境內耆宿長者訪求德
行聲名著于州里之人先從鄰里保舉有司再驗言貌
書判方許進呈若不行公同精選者坐以重罪 三十
五年 詔山林隱逸懷才抱德之士有司詢訪以禮敦

請赴京量才擢用其有志尚閒逸不願出者具名來
奏 十八年十二月丙午 詔舉孝廉之士 十九年
七月 詔舉經明行修練達時務之士年七十以上者
郡縣禮送京師 上諭禮部郎中鄭居貞曰古之老者
雖不任以政至於咨詢謀謨則老者閱歷多而見聞廣
達於事情周於物理有可資者居貞對曰人至六十精
力衰耗則不能勝事請六十以上者不遣 上曰正爲
比來有司不體朕意士有耆年便置不問豈知老成古
人所重文王用呂尚而興穆公不聽蹇叔而敗伏生雖
老猶足傳經豈可槩以耄而棄之也若年六十以上七
十以下者當置翰林以備顧問四十以上六十以下者

則於六部及布政使司按察司用之 二十二年十二
月徵士梁寅卒寅字孟敬臨江新喻人世業農家貧力
學通六經之旨累舉于鄉不第遂棄舉業一時名士多
與之交元爲集慶路儒學訓導以親老辭歸時天下兵
起遂隱居教授及我 明興徵天下名儒修述禮樂寅
就徵已六十餘矣時以禮樂制度分爲三局寅在禮局
中討論精審諸儒推服書成將授以官寅以老病辭歸
結屋石門山四方士多從之學者稱爲梁五經至是卒
年八十二所著有周易叅議詩書演義周禮考註春秋
考義及漢唐以來君臣事畧宋元史節要及石門集
三十一年八月 建文帝徵江西處士楊士奇克實錄

編纂官尋授 齊府審理副仍留編纂 十二月令內
外群臣各舉山林巖穴懷材抱德之士 又 詔舉優
通文學之士以處士唐愚士爲翰林侍讀

按 太祖自立國時省臺要地俱以勲舊充之其所聘
用如劉誠意宋文憲輩雖禮遇優崇而頗循資序自胡
陳之後群臣鮮當意者法網嚴密誅斥相繼而學士大
夫亦多所引避於是不愛高爵越資以收天下之賢俊
而有朝徒步暮金紫者永樂中亦間行之

洪武初徵儒士王本杜敷趙民望吳源爲四輔官兼太
子賓客位尚書上賢良郭允道秀才范敏曾泰爲戶部
尚書稅戶人才義門鄭沂爲禮部尚書儒士趙翥爲工

部尚書武英堂紀事監生黃義爲湖廣行省叅政儒士
張子源試禮部右侍郎張宗德試兵部右侍郎耆儒劉
靖關賢爲諫院左右司諫兼左右春坊左右庶子趙肅
何顯周爲左右正言兼左右諭德儒士藍子貞張伯益
爲都察院左右副都御史陳玄爲右僉都御史明經張
文通阮仲志試左右僉都御史八才赫從道試大理寺
右少卿孝廉李德爲南京應天府府尹儒士吳顥爲國
子祭酒稅戶義門鄭濟王勲爲春坊左右庶子賢良孟
性賢爲廣西左叅政文學宋亮爲福建左叅政儒士邢
浩爲河南盧友常爲山東濟瞻爲四川俱左布政使金
良佐爲廣東吳昭爲山西陳宗顏爲陝西俱右布政使

又鄒伯源等十一人爲各布政司參政參議張璩爲陝西左布政使 處善爲湖廣徐子民爲山東曹岱爲浙江梁伯與爲河南彭友信爲北平韓宜可爲山西李宜之爲江西俱右布政使國子監生劉政鄧志和爲福建左右顏鈍申達爲北平左右周震張璉爲河南左右王允陳嘉爲山西左右薛郁董倫爲陝西左右俱布政使楊允爲浙江楊鏞爲山東方溫爲湖廣俱右布政使龍鐔爲浙江阮友章爲福建王禮爲北平李皓爲山西曲能爲山東俱按察使蕭禮敬等二十五人爲左右參政參議朱源等二十一人爲副使僉事其一時銓補乃爾豈空印事發藩臬諸臣俱得罪耶留守中衛指揮僉

事陳燦子信試四川左參議官舍鳳陽留守中衛指揮僉事韓春子恕試右參政駙騎右衛千戶俞清弟立以軍餘試廣東左參政府軍左衛千戶陳亨弟貞以軍餘試右參政人材董從先魯昉楊仲禮署浙江王守政蔡均美謝直方王秉彛署福建俱布政司官 四年京畿鄉試以前元貢士鮑恂與學士宋濂等同爲考試官

成祖永樂元年 勅內外諸司文職官各舉所知或堪重任或沉滯下僚或可剗繁而優游散地或抱道懷才隱居田里無問遠近並舉以聞 初 詔修 高廟實錄布衣陳濟與學士解縉等爲總裁而禮部尚書李至剛及講讀以下僅爲纂修官 又以人材馬麟爲湖廣

盛儀爲浙江俞景周爲山東周克敬爲廣西俱左布政使孫豫爲山西江潤爲河南艾英爲浙江俱右布政使吳衡等六人爲參政參議 五年六月 勅張輔沐晟劉儁訪求交趾人才禮送赴京擢用 十月以交趾所舉明經士人甘潤祖等十一人爲諒江等府同知 賜

勅慰勉

仁宗洪熙元年 詔民間有行已廉正才堪撫字者許見任官具實舉薦

宣宗宣德七年 詔各處有文學才行出衆之士自二十五歲以上令所在有司保舉赴京選用 八年 詔各布政司按察司府州縣官連名舉保賢良方正一人起

送吏部量才擢用

英宗正統十四年 詔各處舉到儒士照永樂年間事例送翰林院嚴加考試選用不中者發原籍爲民

景皇帝景泰三年 詔各處見任官員果有才行行政事優長拘於資格屈在下僚及有文學才行堪授職任之士隱於民間及官員罷職委無賊犯重情而才學可用者並聽在內四品以上官員在外巡撫巡按方面并各府州縣正官指陳實跡薦舉赴京考用所舉之人後犯賊罪連坐舉主

英宗天順元年 詔處士中有學貫天人才堪經濟隱居高蹈不求聞達者所司具實奏聞 五年令天下有才

兼文武或學行異等或謀勇出衆者許所在官司具實
奏聞

憲宗成化十九年九月授吏部聽選舉人陳獻章爲翰林
檢討獻章廣東新會人巡撫廣東都御史朱永等薦其
學行可以追匹古人乞以禮徵聘吏部謂獻章乃聽選
舉人非隱士比遂移文取至京欲考試職事獻章奏言
臣以舊疾未平未能就試母年七十有九乞放歸侍養
上特授以翰林檢討聽歸一時推尊之目爲道學

二十年三月徵處士吳居仁尋卒居仁字叔心江西餘
干人自幼穎異有大志嚴毅清苦澹養體驗慨然以斯
道自任所著居業錄敬齋集

孝宗弘治十年令府州縣正官保舉山林隱逸之士懷才
抱德經明行修衆所推服者許巡按及布按二司官覈
實奏送吏部量才擢用如所舉不當保勘官員一體叅
究時有儒士潘辰以廷臣薦授翰林待詔歷官太常寺
卿

世宗嘉靖二年生真文徵明以巡撫薦 八年儒士葉幼
學以輔臣薦俱授待詔

穆宗隆慶三年祭酒姜寶題請舉人中如有孝友睦婣名
實相孚不分已未坐監許撫按官會薦遇有兩京博士
之缺酌量推用于是四川舉人趙蒙吉南直隸張弘道
陝西呂潛袁禎等俱薦授國子學正等官

按霍韜曰 國初用人薦舉為重貢舉次之科舉為輕今則科舉為重貢次之薦舉不行矣故有行同盜跖心劣商賈者能染翰為文俱隸仕籍此風所以益偷也

國朝優禮處士其以禮自處者無過於陳靜誠遇吳康齋與弼武學士周文而已陳在 高帝初應聘與參帷幄大計再授翰林院學士辭授禮部侍郎尚書左丞又辭竟以處士卒遣中官 諭祭官為購葬有子枋以遇故特擢累官至尚書武在 文廟初以 藩邸講讀之舊驛召至京 賜襲衣銀帶鞍馬以為翰林侍講學士固辭聽以學士致仕 賜勅及白金文幣酒饌馳驛歸吳在 英廟時徵時石亨用事邀名飾過其門客謝也

倣張翕教蔡京招楊時故事勸以薦士亨從之因見李賢說山林隱士有撫州吳與弼者乃司業吳溥之子以學行名天下亨慨然代為草奏上之 上召賢問曰吳與弼如何賢承亨意對曰與弼儒者之高蹈自古聖帝明王莫不好賢下士徵聘隱逸若 陛下行此一事實本朝盛舉 上遂 命行人聘之越五月徵至京上謂李賢曰與弼當授以何職賢對曰今 東宮講學宜授 宮僚次日 召吏部 命為左諭德朝士皆驚以布衣召至一旦授此與弼疏辭 上召入文華殿問曰特聘爾來何不就職與弼對以老疾 上曰宮僚亦優閒不必辭 賜以文綺羊酒薪米 命太監牛玉送

至館務今就職與弼具疏固辭 上復召入 文華殿
賜 勅褒嘉賚以銀幣允其所辭與弼疏陳十事 上
命有司月給俸米以贍終身仍 命行人送歸與弼復
上表謝 恩而去 漳州布衣陳真晟詣 闕上程朱
正學纂要不報真晟初治舉子業赴省試聞有司防察
過嚴無待士禮乃辭歸自是不復科舉務為主敬誠意
之學至是詣 闕上書不報乃聞吳與弼名欲往見之
行至江西見編修張元禎元禎謂曰濂洛之學自有真
傳如與弼者不可見亦不必見也遂歸尋卒

國初徵薦姓名

制科姓氏庠序有碑賢書有錄足垂不朽矣惟徵薦之

在 國初者歲月滋久掌故無徵余恐其愈遠而愈湮
也姑即其宦蹟顯著者詮次于左以備參考

宋濂浙江浦江人洪武初徵聘二年任學士謚文憲

劉基浙江青田人 國初徵用洪武元年拜御史中丞

兼 太子贊善大夫三年授弘文館學士封誠意伯

四年歸田

章溢浙江龍泉人 國初徵用元年拜御史中丞兼

太子贊善二年守制

吳沉金華人洪武中薦舉任東閣大學士

宋訥滑縣人洪武中薦舉十五年任文淵閣大學士

黃蕭洪武初薦舉五年任工部尚書

陳世舉應天上元人洪武初薦舉五年任太常卿

趙名重洪武初薦舉八年任太僕卿

陶凱浙江天台人洪武初由薦舉官禮部尚書五年出

湖廣叅政後以罪廢

宋德潤直隸泰興人由薦舉洪武六年任吏部侍郎

任源山西武鄉人由薦舉洪武十三年任吏部右侍郎

韓膺山東平度人由薦舉洪武十四年任吏部左侍郎

陳敬洛陽人洪武初以行義舉十六年由侍郎試吏部

尚書本年坐累死

陳洽直隸武進人洪武中由薦舉永樂十三年任兵部

左尚書後征黎賊卒于師謚節愍

孫瑜四川犍爲人洪武中薦舉永樂元年任戶部左侍

郎

曹洪湖廣襄陽人洪武中薦舉永樂十一年任戶部右

侍郎

陳山福建沙縣人洪武中薦舉洪熙元年任戶部左侍

郎

楊思濟河南歸德人洪武初由薦舉六年任禮部右侍

郎九年免

劉嘉議洪武初由薦舉十四年任禮部左侍郎十七年

免

張子源洪武初由薦舉十五年任禮部右侍郎本年免

王志直隸藁城人洪武初由薦舉十七年任禮部右侍郎十八年免或云伏誅

蔣源洪武中由薦舉革除元年任禮部右侍郎二年免李琦直隸元氏人洪武末由薦舉宣德元年任禮部右侍郎二年出使安南改湖廣右布政使卒于途

章祥洪武初薦舉十八年任禮部左侍郎

鮑恂崇德人洪武中薦舉十六年拜文華殿大學士未任辭

全思誠上海人洪武中薦舉十六年拜文華殿大學士尋以疾辭

余詮安吉人洪武中薦舉十六年拜文華殿大學士未

任辭

張長年高郵人洪武中薦舉十六年拜文華殿大學士未任辭

陳則崑山人洪武初薦舉八年任戶部左侍郎

魏鑑洪武初由薦舉任禮部右侍郎

李榮直隸清苑人洪武初由薦舉五年任兵部右侍郎

商英河南陳留人洪武初由薦舉六年任兵部左侍郎

趙圭玉浙江山陰人洪武初由薦舉七年任兵部右侍郎

郎

張易河南鄆陵人洪武中由薦舉十四年任兵部右侍郎十七年致仕

俞綸洪武初由薦舉十七年任兵部尚書

蘭選山東博興人洪武中由薦舉十八年任兵部左侍郎二十年免

郭良陝西華陰人洪武中由薦舉二十三年任兵部左侍郎

許濂山東濰縣人洪武中由薦舉二十五年任兵部左侍郎

葉瓛洪武中薦舉二十七年任兵部右侍郎二十八年免

徐宗實浙江黃巖人洪武中由薦舉革除二年任兵部右侍郎四年死靖難

崔衍山東膠州人洪武末由薦舉永樂十八年任兵部

右侍郎二十二年調四川右布政

張仁由薦舉洪武元年任刑部侍郎

左安善洪武初由薦舉二年任刑部侍郎三年調河南

知府

黃欽洪武初由薦舉六年任刑部左侍郎本年免

李浩山西曲沃人洪武初薦舉七年任刑部左侍郎本年使琉球

臧哲山東諸城人洪武初薦舉八年任刑部左侍郎九年陞四川行省叅政

趙毅河南汝陽人洪武末薦舉永樂二年任工部左侍郎

郎七年調交趾

劉昱山東武城人洪武中薦舉二十年任右通政

何懷輝湖廣桂陽人洪武初薦舉二十五年任通政司

左參議

鄒魯盱眙人洪武中薦舉二十年任大理寺丞

商敬洪武初薦舉十九年任太僕卿

陳援烏程人洪武中薦舉二十一年任大理右寺丞

翁銘壽州人洪武中薦舉二十七年任太僕卿

樂禮全椒人洪武初薦舉十二年任太常卿

王希哲洪武初薦舉十五年任刑部右侍郎十六年伏

誅

葛修洪武中由薦舉十七年任刑部左侍郎十八年伏

誅

周邦洪武中薦舉十七年任刑部右侍郎本年免

邵質洪武中薦舉十七年任刑部右侍郎十九年免

徐文顯洪武中薦舉十七年任刑部右侍郎十八年免

謝祥洪武中薦舉二十一年任刑部右侍郎本年免

黃紹祖洪武中薦舉二十二年任刑部右侍郎二十三

年免

祁鑑洪武中薦舉二十三年任刑部右侍郎二十五年

免

李似初洪武中薦舉二十四年任刑部左侍郎二十六

年免

周志清洪武中薦舉二十五年任刑部右侍郎二十七年免

蔣毅浙江長興人洪武中薦舉二十七年任刑部左侍郎革除二年調浙江按察使

楊泰直隸山陽人洪武中薦舉永樂五年任刑部右侍郎本年卒

張允文由薦舉洪武元年任工部侍郎

梁說陝西開城人由薦舉洪武六年任工部右侍郎八年出守廬州府

韓鐸河南太康人由薦舉洪武十七年任工部左侍郎

十八年免

孟維新山東博興人由薦舉洪武二十六年任工部右侍郎

王文質河南內鄉人由薦舉洪武三十一年任工部右侍郎

張昂浙江慈谿人由薦舉洪武三十一年任工部左侍郎出為北平左布政使死難

魏澤溧水人洪武中薦舉二十六年任刑部尚書謫寧海典史

趙和洪武中薦舉二十一年任大理卿

陳晟寶應人洪武中薦舉二十三年任大理左寺丞

劉龍吉水人洪武初薦舉十三年任戶部右侍郎

聞良輔德清人洪武中薦舉三十一年任大理右少卿

胡閏潘陽人洪武中薦舉建文三年任大理寺右少卿

四年死靖難

藺芳山西夏縣人洪武中薦舉永樂十年由工部主事

推工部右侍郎十五年卒

胡鉉洪武初薦舉三年任弘文館學士六年致仕

王永壽山西太原人洪武中薦舉正統十三年任工部

右侍郎

曾秉正山東萊州人洪武初由薦舉十年任通政使十

五年削籍腐刑

睢稼洪武初薦舉歷中書省參政三年任弘文館學士

尋致仕

來徵洪武中由薦舉二十八年任通政使

李仕魯山東濮州人洪武初由薦舉十四年任通政使

十六年忤旨死

薛嵩河南閿鄉人洪武中由薦舉革除四年任大理卿

永樂二年謫廣西

呂震陝西臨潼人洪武中由薦舉永樂二年任大理卿

耿通山東齊魯人洪武中由薦舉永樂四年任大理卿

出使安南後坐奸黨死

趙仁山東寧海人洪武初由薦舉十八年任兵部尚書

藍子貞江西吉水人由薦舉洪武十七年任左副都御史本年免

齊魯河南嵩縣人由薦舉洪武二十年任左副都御史

李鎬山東清平人薦舉洪武二十六年任右副都御史

鄭楚瞻浙江崇德人由薦舉洪武二十一年任右副都

御史革除中免

茅大方直隸太興人洪武中由薦舉革除元年任右副

都御史四年死靖難

紀著直隸開州人由薦舉洪武十六年召任右僉都御

史尋乞致仕

高翼山東棲霞人由薦舉洪武十七年任左僉都御史

十九年卒

元善由薦舉洪武十七年任右僉都御史十八年免

劉文進山東鄒平人由薦舉洪武十八年任左僉都御

史二十年免

夏長文直隸上海人由薦舉洪武二十三年任左僉都

御史本年免

溫原直隸樂亭人由薦舉洪武二十四年任左僉都御

史二十五年免

祝春蒲州人洪武中薦舉二十五年任少詹事兼侍講

李文吉洪武中薦舉二十五年任少詹事兼侍講改左

僉都御史

周彥奇吉水人洪武中薦舉永樂十五年任大理少卿
祁著洪武中薦舉二十六年任戶部左侍郎

董子莊臨川人洪武中薦舉永樂十年任司業

李欽直隸邢臺人由薦舉洪武二十六年任左僉都御
史

周顓山東安丘人由薦舉洪武三十年任右僉都御史
本年免

韓焯洪武初年薦舉八年任戶部尚書本年免

宋冕洪武初年薦舉八年任戶部尚書本年免

周斌洪武初薦舉九年任戶部尚書十年致仕

沈立本洪武初年薦舉十年任戶部尚書十一年陞山

西布政卒於官

顧禮蘇州崑山人洪武初徵舉十二年任戶部尚書本
年免

任彬洪武初年薦舉十二年任戶部尚書十三年免

徐鐸江西豐城人洪武初年薦舉十三年任戶部尚書
本年免後起山東布政使卒於官

劉平仲洪武初年薦舉十三年任戶部尚書本年免

徐恢浙江常山人洪武初年薦舉十四年任戶部尚書
本年下獄 命減死論

曾泰洪武初由薦舉十五年任戶部尚書本年免

王肯洪武初年薦舉十五年由刑部尚書改任戶部尚

書十七年免

陳廸直隸宣城人洪武乙卯薦舉三十一年任禮部尚書革除四年靖難族誅

高信浙江義烏人洪武中薦舉十五年任禮部尚書本年致仕

何禮直隸清苑人洪武初年薦舉十五年任兵部尚書十六年免

王道亨洪武初薦舉十八年任戶部左侍郎馬麟直隸大名入洪武中薦舉二十四年以大理寺丞

署兵部尚書事本年回寺

劉惟謙吳元年薦舉洪武四年任刑部尚書本年調四

川行省叅政六年再任七年免

孫堯洪武初年薦舉六年任刑部尚書本年調四川行省叅政後坐事免

邢懋山東武定人洪武初年薦舉十年任刑部尚書本年免

王惠迪洪武中薦舉十七年任刑部尚書十八年坐法暴昭山西浮山人洪武中薦舉三十一年任刑部尚書

建文元年克北平採訪使四年靖難師入京被執以節死

侯泰直隸南和人洪武中薦舉革除二年任刑部尚書四年靖難師起被執以節死

王大中洪武中薦舉三年任弘文館學士本年致仕
潘孟舉陝西澄城人洪武中薦舉二十年任工部尚書
二十二年免

楊士奇名寓以字行江西廬陵人由薦舉授審理副洪
武三十五年爲翰林編修永樂五年以左諭德輔
東宮正統九年以少師 華蓋殿學士卒年八十
朱升直隸休寧人 國初薦舉洪武元年任學士三年
致仕

劉三吾湖廣茶陵人洪武初薦舉十八年任學士三十
年下獄 賜死

鄒瑾江西永豐人洪武中薦舉革除二年任大理右寺

丞四年死靖難

遠志洪武中薦舉永樂四年任大理左寺丞

劉辰金華人洪武中薦舉永樂三年任刑部左侍郎

董倫順天宛平人由薦舉洪武三十一年以禮部左侍
郎兼任學士建文四年致仕

王景彰浙江松陽人由薦舉建文元年以禮部右侍郎
兼任學士四年 文皇卽位 命專爲學士六年卒
於官

李翀山西壺關人由薦舉洪武十五年任侍講學士遷
浙江右布政使

高巽志直隸蕭縣人由薦舉洪武三十一年任侍講學

士遷太常少卿

方孝孺浙江寧海人洪武中薦舉建文二年任文學博

士即講讀也靖難後抗節死

王達直隸無錫人洪武中薦舉永樂元年任侍講學士

三年卒

喬隱山東章丘人洪武末薦舉永樂元年任刑部左侍

郎

朱逢吉崇德人洪武中薦舉建文四年任大理右寺丞

永樂元年卒於官

戚遜洪武中薦舉建文四年任大理右寺丞永樂元年

陞山東叅政

費震江西鄱陽人洪武初年徵賢良十一年任戶部尚

書十二年陞湖廣布政使致仕

夏恕河南洛陽人洪武中舉賢良二十八年任刑部尚

書三十一年免

嚴震直浙江烏程人洪武庚午舉賢良二十六年任工

部尚書二十七年降御史歷都察院右都御史三十

年再任本年致仕建文四年巡撫山西卒

岐亨山西解州人以賢良方正舉洪武十九年任右副

都御史

周均德四川宜賓人以聰明正直舉洪武九年任工部

右侍郎十二年免

詹同直隸婺源人國初以文學徵洪武四年任吏部

尚書六年加學士承旨兼吏部尚書七年致仕

吳琳湖廣黃崗人國初以文學徵洪武六年任吏部

尚書七年以老致仕

高啓直隸長洲人洪武二年由文學徵三年自翰林編

修陞戶部侍郎未任辭歸

杜智蕪湖人洪武中舉文學永樂二十二年任南京左

都御史

呂復江西興國人洪武初徵文學五年任太常卿

曾魯江西新淦人洪武初以文學徵修元史五年任禮

部侍郎本年致仕

許存仁浙江金華人洪武初以文學徵吳元年任祭酒

洪武元年被劾去

明克新陝西秦州人洪武中舉文學任禮部尚書卒于

官

王克巳山西壽陽人洪武中薦文學十三年任吏部尚

書十四年致仕

阮峻浙江仁和人洪武初年舉文學十三年任吏部尚

書十四年致仕

李敬直隸江都人一名鴻漸洪武元年舉文學六年任

刑部尚書本年致仕後起國子祭酒罪免

馬京陝西武功人洪武中舉文學永樂元年任刑部左

侍郎

冀凱河南鹿邑人以文學貢洪武二十七年任工部左

侍郎

杜澤山東沂水人洪武中舉文學二十九年任吏部尚

書三十一年以年老致仕

郭允道陝西安塞人洪武初年舉文學十五年任戶部

尚書本年免

劉仲質江西分宜人洪武初年舉文學十五年任禮部

尚書本年改華蓋殿大學士降監察御史致仕

周湏江西鄱陽人國初舉文學洪武三年拜刑部尚

書初入官責胥吏貶南州府經歷

張道經山東蒲臺人洪武初舉文學十八年試戶部右

侍郎本年改大理卿

范俊湖廣大冶人舉文學洪武二十八年任右僉都御

史

張紳直隸貴池人以文學舉洪武十六年任右僉都御

史十七年免

魏觀湖廣蒲圻人國初以文學舉洪武三年任祭酒

四年坐視禮不以時奏謫

王起東浙江上虞人洪武中以文學舉二十三年試禮

部侍郎二十四年免

易英湖廣澧州人洪武末舉文學十六年任禮部右侍

郎十七年卒

秦約直隸崇明人洪武初以文學舉四年任禮部侍郎

本年致仕

陳昱洪武初年舉才能十二年試任吏部尚書十三年

免

詹徽同子洪武中舉才能十八年以左都御史命兼

吏部尚書二十四年坐藍黨誅死

盛元輔 國初薦才能洪武七年任吏部尚書八年免

陳穆浙江烏程人洪武中舉文學永樂四年任大理左

寺丞

馮堅舉才幹任南豐典史洪武二十四年上言五事擢

左僉都御史

李敬臣陝西鳳翔人洪武初舉人才六年任刑部侍郎

七年免

張文昱應天上元人洪武中舉人才十八年任刑部右

侍郎十九年免

楊翼安直隸靈璧人舉人才洪武元年任工部侍郎二

年出為河間知府

湯有恭懷遠人洪武中以人才舉十七年任右都御史

封益 國初舉人才任戶部右侍郎

王儁舉人才洪武二十七年任工部左侍郎

馮天孫浙江歸安人舉人才洪武三十年任工部右侍

郎以病乞休

邊昇山東歷城人舉人才洪武三十一年任工部右侍郎本年免

甄庸順天宛平人洪武中舉人才二十二年任工部尚書宣德二年致仕

蔣廷瓚直隸滑縣人洪武中舉才行永樂七年任工部右侍郎十一年出爲貴州左布政使

陳瑛直隸滁州人洪武末由人才舉革除四年任左副都御史永樂元年任左都御史十年下獄死

藥理舉人才洪武十七年任右僉都御史本年免

蘇瓚河間人洪武中舉人才永樂十六年任工部右侍郎

郎

戴瑀廣東海陽人舉人才洪武二十三年任左僉都御史二十四年免

劉士英河南洛陽人舉人才洪武二十三年任右僉都御史二十四年免

劉倫舉人才洪武二十五年任右僉都御史二十六年免

李敘荆名鎬江西崇仁人洪武初舉人才二十一年任祭酒

劉淪舉人才洪武二十七年任右僉都御史二十八年免

王平四川新繁人舉人才洪武二十七年任左僉都御

史

嚴德明舉人才洪武二十八年任左僉都御史

司中舉人才洪武三十年任左僉都御史

周璿山東諸城人舉人才洪武三十一年任左僉都御

史

朱從善直隸泗州人 國初舉人才四年任戶部侍郎

向志仁洪武初舉人才十三年任戶部右侍郎

傅鐸直隸內黃人 國初舉人才十三年任戶部左侍

郎

陳居敬直隸蒙城人舉人才二十七年任戶部左侍郎

郭任直隸丹徒人洪武中舉人才三十四年任戶部

郎死難

盧迥浙江仙居人洪武中舉人才三十四年任戶部右

侍郎死難

張炳山西澤州人洪武中舉人才二十六年任禮部右

侍郎二十八年轉左革除元年改北平左布政被執

而死

吳景玄浙江括蒼人洪武中舉人才元年任禮部侍郎

本年致仕

何禮直隸清苑人洪武初舉人才十五年任兵部尚書

徐銘直隸丹徒人洪武中舉人才七年任兵部右侍郎

郁新直隸臨淮人洪武中以人才徵二十六年任戶部尚書三十一年閒住建文四年起復三年卒

楊訓文四川潼川人洪武初年舉人才四年任協陶凱

理禮部事六年改戶部尚書

董俊山西太原人洪武初年舉人才十二年任兵部尚

書十三年致仕

劉昭先洪武初年舉人才六年任協牛諒理禮部尚書

事七年罷

馮諒直隸興化人洪武初年舉人才十一年任刑部尚

書十二年免

劉達河南項城人洪武初年舉人才十七年任刑部尚

書本年免

李敏直隸潁州人洪武初年舉人才六年任工部尚書

七年陞江西行省叅知政事九年再任本年卒

王虎洪武初年舉人才九年任工部尚書十二年免

余文昇直隸丹徒人洪武初年舉人才十二年任工部

尚書十三年免

彭祥洪武中舉人才十七年任左都御史

李寅即文仲洪武十二年舉人才任工部左侍郎

安信洪武十五年舉人才任工部右侍郎

高寧舉人才洪武十五年任工部左侍郎

趙俊洪武初舉人才十五年任工部尚書十七年免

徐本江西人洪武初舉人才十八年任工部尚書二十年免

彭與民江西萬安人洪武中舉人才三十年任大理寺左寺丞革除四年監軍被害一云名與明

李禎山東丘縣人洪武中舉人才十八年任工部左侍郎

李端洪武中舉人才十七年任戶部右侍郎

郭桓洪武中以人才舉十七年任戶部左侍郎

湯伸行浙江歸安人洪武中舉稅戶人才二十七年任吏部右侍郎

嚴良奇浙江長興人洪武中舉稅戶人才三十年任刑

部左侍郎爲民永樂元年復任

潘長壽浙江長興人舉稅戶人才洪武三十年授右僉都御史本年以直諫出知南雄府致仕

陳桎浙江奉化人洪武初舉明經二年任直學士

錢唐浙江象山人洪武元年以明經任刑部尚書

鍾永浙江慈溪人國初以明經舉二十九年任戶部左侍郎

朱同直隸休寧人洪武中舉明經十五年任禮部右侍郎十六年坐事廢

儲可求直隸宜興人名才洪武初舉明經十六年任禮部右侍郎二十年免

張智福建順昌人洪武中舉明經二十四年任禮部右侍郎二十六年謫學錄歷國子司業

鍾勗浙江慈溪人洪武中舉明經十六年任兵部左侍郎本年卒

劉崧江西泰和人洪武初年舉明經十三年命以禮部侍郎試吏部尚書本年致仕復起國子司業卒于官

宋復初滑縣人訥次子洪武中舉明經二十六年任祭酒

余燦直隸崑山人洪武初舉明經十七年任吏部尚書十八年坐法

張統陝西富平人洪武初年舉明經三十一年任吏部尚書革除四年靖難師入尋自經于部之後堂

開濟河南洛陽人洪武初年舉明經十五年任刑部尚書十六年坐法

葛鈞河南洛陽人洪武中舉明經二十年任侍講學士謫國子助教

吳顛河南歸德人洪武初舉明經十五年任祭酒十六年坐罪

楊松江西建昌人舉明經洪武二十九年任祭酒三十年免

張謙江西南昌人洪武初舉明經十年任刑部右侍郎

十一年致仕

和希文山西平定人洪武四年舉明經二十六年任刑

部左侍郎

宋性山東德州人舉明經洪武二十九年以刑部主事

署本部右侍郎三十年出為湖廣副使

李至剛華亭人洪武末舉明經建文四年任禮部尚書

永樂二年兼左春坊大學士三年降本部郎中下獄

二十二年調興化知府宣德二年卒于官

武周文順天宛平人洪武中舉明經永樂四年任侍講

學士

劉伯符吉水人洪武中舉明經二十四年任大理左寺

丞

唐廣雲名耕廣西桂林人洪武中舉明經永樂九年任

祭酒

趙季通浙江天台人洪武丁卯舉明經永樂四年任祭

酒

王嘉會嘉興人國初舉明經洪武十五年任祭酒

胡季安江西南昌人洪武初舉明經儒士二十五年任

祭酒二十九年坐黨罪免

朱俊浙江縉雲人由舉明經洪武二十年任刑部右侍

郎本年免

歐陽性直隸吳縣人舉儒士洪武十八年任刑部右侍

郎二十一年免

胡子昭四川大足人洪武末舉儒士黃除二年任刑部
右侍郎四年死靖難

溫洋卿山西人流寓浙江長興 國初舉儒士洪武十

七年任兵部尚書十八年降刑部主事歷四川布政
陳玄福建閩縣人洪武中以通經儒士薦 召拜右僉
都御史本年致仕

張克誠順天房山人舉明經洪武二十七年任左僉都
御史本年免

程本立浙江崇德人舉明經洪武三十一年任右僉都
御史革除四年以失誤調江西副使

趙民望直隸藁城人洪武初以儒士舉十三年任夏
兼 太子賓客本年免

顧或上海人洪武中舉明經二十六年任戶部右侍郎

唐汝楫西安人洪武中舉儒士永樂初任刑部侍郎

李祐山西安邑人洪武中舉者儒士十三年任春官兼

太子賓客本年致仕

滕毅洪武元年以儒士歸附任吏部尚書二年陞江西
叅政

龔敷江西鉛山人洪武初以明經者儒薦國子祭酒十
三年任春官兼 太子賓客本年引疾

杜敷山西壺關人洪武中舉者儒士十三年任夏官兼

太子賓客本年致仕

吳源福建莆田人洪武初舉明經者儒十三年任夏官
兼太子賓客本年以老歸後起國子司業

何顯周直隸內黃人洪武初薦舉者儒十五年任四輔
本年致仕

任昂河南河陰人洪武初年舉文儒十六年以禮部尚
書署吏部事十七年以年老致仕

趙瑁河南宜陽人洪武初年舉文儒十八年以吏部尚
書本年以禮部事坐法

李彥名直隸安州人洪武中以通經儒士舉用二十年
任禮部尚書二十三年致仕

班用吉河南延津人洪武元年舉儒士三年任刑部尚
書四年降江西副使陞叅政坐事免歷應天府尹調
四川按察使卒

馮冕河南孟縣人洪武初年舉儒士七年任刑部尚書
十年以疾致仕

趙翥河南永寧人洪武七年舉儒士十二年任刑部尚
書本年免

石璞河南陝州人洪武中舉儒士十三年由教諭陞戶
部右侍郎

王中立山西平定人洪武中由儒士六年任禮部左侍
郎本年致仕

儀智山東高密人洪武末儒士薦舉永樂六年任禮部侍郎十九年致仕謚文簡

謝冕蒲州人洪武中舉儒士永樂元年任大理左寺丞唐宗魯浙江建德人舉通經秀才洪武四年任工部侍郎

郎本就以疾歸 曹九臯山西潞州人舉秀才洪武十八年任左副都御史二十年免

馬守中河南陽武人舉秀才洪武十九年任右僉都御史二十九年免

戴綸山東高密人永樂初薦舉洪熙元年任兵部左侍郎本年下獄 賜死

王中直隸定州人永樂中薦舉二十二年任太僕卿

李敷順天涿州人永樂中薦舉正統九年任吏部左侍郎

周丹湖廣益陽人永樂初舉才能十一年任大理卿

趙琬直隸武進人永樂中舉明經正統九年任司業

鄭堪浙江浦江人永樂初薦舉宣德元年任大理左寺丞

鄒濟餘杭人永樂中薦舉十八年任少詹事兼侍讀學士謚文敏

李珉河東陳州人由薦舉宣德四年任左僉都御史趙榮福建閩縣人陝西通渭縣籍正統中舉楷書生員

天順元年任七年卒

楊荔直隸吳縣人正統中薦舉十四年任兵部右侍郎

續文獻通考卷之四十九

皇明進士雲間王圻纂輯

選舉考 任子 童科

任子

宋

寧宗嘉定十四年夏四月命任子兼試於御史臺 時薛

極以父蔭補上元主簿 十五年二月罷御史臺兼試

任子法

理宗寶慶元年詔胄試仍舊制職事官牒同居五服內親

釐務官牒同居小功親銓次三人取一從李知孝請也

紹定六年詔史彌遠二子宅之宇之並賜同進士出

身尋以宅之爲太府少卿兼崇政殿說書宇之爲將作少監 端平元年詔省吏官至朝奉中散中奉大夫者存歿任子不許過二三人密院比類一體施行令有司裁抑參著爲令從臣僚請也 淳祐二年勅令臣寮世賞不許奏異姓著爲令 六年以前四川制置使陳隆之殉國於合得延賞外更官其二子 時陸游年十二補蔭登仕郎 七年詔武功郎揚州寧淮軍總制張忠戍守浮山手搏虜酋俱死於水特贈武畧大夫官其子寶祐四年詔開國以來勲臣之裔有能世濟其美不能世濟其祿者所在州軍體訪以聞 開慶元年詔荆湖制置司叅謀官王登素懷忠義累著勲勞未及功成

而歿特贈官五等合得致仕恩外更官其一子又以段元鑑楊禮忠亦可褒各贈節度使致仕恩外更官其一子 景定二年都省言徐霖自改官後實歷十餘年不曾陳乞磨勘轉官今已致仕合行旌異詔官其一子

遼

太宗天顯二年十二月詔選遥輦氏九帳子弟可任官者穆宗應曆五年四月命郎君蕭海瓌世爲北府宰相 時蕭護思爲北院樞密使命世預宰相選辭曰臣子孫賢否未知得一客省使足矣從之 景宗保寧時耶律思溫爲北院樞密使兼北府宰相仍命世預其選

聖宗統和元年九月皇太后言故于越屋質有輔導功宜錄其子孫遂命其子泮泱為林牙 九年七月詔有没于王事者官其子孫 時耶律諸理伐宋獲其將康保威以功詔世預節度使選又宰相韓德讓貴寵蕭敵魯希旨言德讓宜賜國姓籍橫帳由是世預太醫選子孫入官者眾

韓德讓賜姓名曰耶律德昌後又賜名隆運

又賜宅及陪葬地宋史載與太后通故其貴

寵若

此 開泰八年十二月詔庶孽雖已為良不得與世選

興宗重熙十六年二月詔世選官擇有才能者用 道宗清寧二年正月詔二女古部世預宰相節度使之選者免皮室軍 咸雍時耶律那也以父幹死王事九歲加諸衛小將軍為題里司徒 太康三年二月詔北院

樞密使耶律乙辛同母兄大奴同母弟阿思世預北南面樞密之選其異母諸弟世預夷離堇選

乙辛皆皇后太子賊臣也

金

熙宗天眷中門廕之制凡一品至八品皆不限所廕之人世宗大定二年二月遣遼陽主簿石抹移迭東京鞠院都監移刺葛補招奚契丹叛人為白彥敬紇石烈志寧所害詔收錄其子 四年五月詔皇家袒免以上親就廕者依格引試中選者勿令當倖使 五年十月制亡宋官當廕子孫者並同亡遼官用廕又曰教坊出身人若任流內職者與文武同用廕自餘有勤勞者賞賜而已昔正隆時嘗使教坊輩典城牧民朕甚不取又更定冒

廢及取廢官罪賞格 七年五月命司天臺官四品以上官改授文武資者並聽如太醫例廢其制凡正班廢亦正班雜班廢亦雜班 十六年以粘葛韓奴之子詳古為尚輦局直長米室為武器直長韓奴被旨招契冊大石後不知所終至是詢知其死節之詳故錄其後 二十年定冒廢罪法 二十九年五月時章宗已即位收錄功臣子孫量才于局分承應 八月初定品官子孫試補令史格

章宗明昌元年十一月以上封事者乞六品官添廢吏部言天眷中八品用廢不限所廢之人貞元中七品用廢方限以數當是時文始于將仕武始于進義以上至七

品儒林忠顯各七階許廢一名至六品承直昭信計九階許廢二人自大定十四年文武官從下各增二階其七品視舊為九階亦廢一名至五品凡十七階方廢二人其五品至三品並無間越惟六品不用廢乞依舊格五品以上皆廢一名六品廢子孫弟兄二人七品仍舊為格時又以舊格雖有已子許廢兄弟姪蓋所以崇孝弟也而新格禁之遂聽讓廢 承安五年四月定猛安謀克鬪毆殺人遇赦免死者不許世襲 時又定承廢人試弓箭格 泰和元年正月太府監孫復言門廢太濫乃更定廢叙法頒行之 舊制司天太醫內侍長行雖至四品如非特恩換授文武官資不許用廢以本人

見充承應難使係班故也 二年定制以年老六十以上退與患疾及身故者雖非文武官資擬令係班除存習本業者聽廕一名止一子者則不須習即廕凡諸色出身文武官一品廕子孫至曾孫及弟兄姪孫六人因門廕則五人二品則子孫至曾孫及弟兄姪五人因門廕則四人三品子孫兄弟姪四人因門廕則三人四品五品三人因門廕則二人六品二人七品一人因門廕則六品七品皆一人舊制門廕惟七品一人餘皆加一人明昌格自五品而上皆增一人凡進納官制正班三品廕四人雜班三人武畧子孫兄弟一人雜班明威一人懷遠以上二人鎮國以上三人司天太醫遷至四品

詔換文武官者廕一人 六年以蒲古烈圖刺完顏十僧皆死國事官其子 七年九月詔應廕之家旁廕者候正廕足其正廕者未出官而亡許補廕一人 哀宗正大二年十一月定經兵州縣職官子孫非本貫理廕及過期不廕等格 五年二月詔書死節子孫于御屏量材官使之 七年八月賜陝西死事之孤益引及絹仍量才任使

元

世祖中統二年九月邢州安撫使張耕告老詔以其子鵬翼代之 三年十二月詔諸路管民總管子弟有分管州府司縣及鷹坊人匠諸色事務者罷之 至元四年

詔諸路官品正從分等職官用廢各止一名 諸廢官
不以居官去任身故致仕其承廢之人年及二十五以
上者聽 諸用廢者以嫡長子若嫡長子有廢疾立嫡
長子之子孫曾玄同如無立嫡長子同母弟曾玄同如
無立繼室所生如無立次室所生如無立婢子如絕嗣
傍廢其親兄弟各及子孫如無則傍廢伯叔及其子孫
諸用廢者孫降子曾孫降孫婢生子及傍廢者皆于
合叙品從降一等 諸廢子入品職循其資考流轉陞
遷庶慎幹濟者依格超陞特恩擢用不拘此例其有不
務庶慎違犯禮法者依格降罰重者除名 諸自九品
依例遷至正二品止於本等流轉二品以上選自特旨

諸職官廢子之後若有餘子不得於諸官府自求職
事諸官府亦不許任用 七年四月勅諸路達魯花赤
子弟廢叙充散府諸州達魯花赤其散府諸州子弟充
諸縣達魯花赤諸縣子弟充巡檢 十五年詔軍官有
功而陞職者舊以其子弟襲職陣亡者計令承襲若罷
去者以有功者代之 十七年詔渡江總把百戶有功
陞遷者總把依千戶降等承襲百戶無遞降職名則從
本等 二月江淮行省左丞夏貴請老從之仍官其子
孫 又許衡致仕官其子師可爲懷孟路總管以便侍
養 十九年奉擬萬戶千戶百戶物故視其子孫堪承
襲者依例承襲外都元帥招討使總管總把視其子孫

堪承襲者止令管其元軍元帥招討子孫爲萬戶總管子孫爲千戶總把子孫爲百戶給元佩金銀符病故者降等惟陣亡者本等承襲 二十三年正月呂文煥以江淮行省右丞告老許之任其子爲宣慰使 二十四年詔諸求襲其父兄之職者宜察其人而用之凡舊臣勲伐及有戰功者其子弟當先任以小職若果有才能則大用之 二十五年詔軍官陣亡者本等承襲病故者降二等雖陣亡其子弟無能勿用雖病亡其子弟果能不必降等於本等用之 二十七年詔凡軍民官陣亡軍官襲父職民官陣亡者其子比父職降二等叙其孫若弟復降一等 三十年詔萬戶千戶百戶分上中

下三等定立條格通行選轉以三年爲滿理筭資考陞加品級若年老病故者令其子弟依例廕叙

成宗大德四年省議諸職官子孫廕叙正一品子正五品叙從一品子從五品叙正二品子正六品叙從二品子從六品叙正三品子正七品叙從三品子從七品叙正四品子正八品叙從四品子從八品叙正五品子正九品叙從五品子從九品叙正六品流官於巡檢內用雜職於省劄錢穀官內用從六品子近上錢穀官正七品子酌中錢穀官從七品子近下錢穀官 諸色目人比漢人優一等廕叙達魯花赤子孫與民官子孫一體廕叙傍廕照例降叙 是年以上都虎賁司并武衛內萬

戶千戶百戶達魯花赤亡歿而無奏准承襲定例似為偏負今後各翼達魯花赤亡歿宜察其子弟有能者用之無能則止 十一年詔色目鎮撫已歿其子有能依例用之子幼則取其兄弟之子有能者用之俟其子長即職還之

武宗至大二年議各衛翼首領官至經歷以上不得陞除似與官軍一體其子孫乃不得承襲今後年踰七十而散官至正四品者宜正從五品軍官內任用 四年詔職官子孫承廕須試一經一史能通大義者免俸使不通者發還習學蒙古色目試者聽仍量進階 是年詔軍官有故令其嫡長子繼嫡長子亡歿令嫡長孫為

之嫡長孫亡歿則令嫡長孫之嫡長子為之若嫡長俱無則以其兄弟之子相應者為之

仁宗延祐六年部呈福建兩廣海北海南左右兩江雲南四川甘肅等處廕叙之人如父祖始仕本處始以本地方叙用據腹裏江南歷仕陞等遷注者其子孫弟姪承廕又注遠方誠可憐憫今將承廕人等量擬叙用福建兩廣八番官員擬江南廕叙海北海南左右兩江官員擬擬接連廕叙雲南官員擬四川廕叙四川甘肅官員擬陝西廕叙

英宗至治元年三月勅罷醫卜工匠任子其藝果精絕者擇用之 三年勅醫卜匠官子孫無廕叙能紹其業者

量才錄用

陶安氏曰有虞世賞岐周世祿獨不世官者人賢否殊也逮至周官師氏以禮樂德行掌國子之教然猶考藝進退未嘗悉世其官而必任焉後世廕補法行或曰顯官必公卿子弟爲之以幼習其業熟朝廷臺閣之儀或曰驕驕不通古今無益于民宜明選求賢除任子之令是皆偏見耳及攷漢儀二千石以上得任子弟擇茂庶者補令丞其法良而未備今制廕補五品之上受命於朝降自六品省銓掌金穀且第其上中下以歲月爲差至滿始受朝命許典民政蓋治民者爲國之大端理財者經國之要務將俾因仕知學練世故涉艱難以培其才然後移以治民故不得不自理財始此則古所無也

順帝至正十五年五月勅主兵官若已擢授其舊職宜別授有功者勿復以子孫承襲

皇明

廕叙之例有五其一用廕以嫡長子若嫡長等殘廢則嫡長子孫以逮曾孫玄孫無則嫡長之同母弟以逮曾玄又無繼室及諸室及諸妾所生者旁廕其親兄弟子孫又無旁廕廕伯叔子孫其二用廕者孫降子曾孫降孫旁廕者皆于應叙品第降一級其三正一品官廕其子於正五品用從一品子則從五品用正二品子則

正六品用從二品子則從六品用正三品子則正七品
用從三品子則從七品用正四品子則正八品用從四
品子則從八品用正五品子則正九品用從五品子則
從九品用正從六品子則於未入流上等職內叙用如
行人巡檢司獄司局批驗鐵冶所官之類正從七品子
則於未入流下等職內叙用如遞運所驛丞開灤官之
類 其四凡職官子孫許廕一人年二十五歲以上能
通本經四書大義者叙用其不通者發還習學再試
其五應叙之人係遠方地面各於原籍附近布政司所
屬銓注

凡廕官各具父祖歷仕緣由去任身故歲月并所授

誥勅彩畫宗支指實該承廕名年甲本處官司體勘房
親揭照籍冊別無詐冒及無陰疾過犯等事上司審驗
相同保結申覆令親齎文解赴部

品官子弟入廕事例

古太學之教自天子之子公卿大夫至元士之適子皆
得入 國初文武官一品至七品之子皆得充國子亦
有及于七品之下者蓋古世祿之義也當是時啓教雖
弘而任官不易非強學登科則積分恒至十餘載而後
使之歷事乃授之官即皆中材其傲淬若是之久鮮不
達已其後言舉諸生即顯盛貴游之家乃不得輒祿宣
德以來時有陳乞惟 上所裁恒必驗其材質試其文

理之可教者而後許之仍令勉學務從科舉出身正統
中有得請入監而屢科不第其齒已長者祭酒以爲言
英宗命入監十年以上准照歷事出身即科舉中式
者會試下第仍須復監循次歷事出身天順元年禮部
復議在京三品以上官之子奏願入監讀書者務從科
目出身不許歷事 上從其言且曰國學乃育材之地
今後不許濫進自是非三品子孫不得陳請矣成化初
令大臣三品以上子孫許一人送監照監例出身隨又
令官非年久有政聲者不許十八年禮部奏准在京三
品以上官政績顯著者廕一子入監必先試能通經書
大義者乃許弘治以來凡京官三品以上已經考滿已

給 誥命者許一子廕叙免考送監惟未及一考并有
過劾退及年遠雜流出身者乃不許其廕子子未仕物
故許其補廕無子者許廕繼嗣之子若應得廕子 恩
典而死許其子孫自陳其間亦有有子而願廕其姪者
嘉靖十二年十五年以 皇子生十八年以立 東宮
恩詔兩京文職三品以上官未及三年考滿者廕一
子入監讀書

國初時品官之子必試其人而後得廕廕必從科舉而後
授官近歲以來廕而獲舉復得以其次子補焉或以嫡
子之子有補叙至曾玄者胄子雖由古義而賞延之典
於是彌隆

宣宗宣德中大理寺卿湯宗子沐故太常寺寺丞孔克準子希經俱乞 恩入監讀書從之

英宗正統二年九月翰林院檢討仍管助教事王仙會子旒始乞 恩得入監讀書惟令科第出身初行在兵部

員外郎俞英子端太醫院醫士王文子謙俱乞 恩得入監至是旒援以為請 上命行在禮部尚書胡濙試

旒文字濙以文理平順奏聞遂許之 十月工部右侍郎張順乞 恩自言其子震素習春秋資質厚重可堪

教養行在禮部以聞 上命震入監讀書 憲宗成化二十三年七月吏部右侍郎劉宣德廕其子秉

常入監至正德十四年秉常鄉試中式補廕其子甫入

監讀書

孝宗弘治二年六月南京吏部尚書王僎奏言先年兵部尚書余子俊廕其姪寰吏部左侍郎崔恭廕其姪柯都

察院左副都御史張瓚廕其姪宥右副都御史孫仁廕其姪珖今臣例當廕子然長子沂叨中進士次子洛年

幼學淺惟姪廩膳生澄粗已成材乞送監讀書從之 七年十一月南京工部致仕尚書胡拱辰乞 恩以子

孟陽入監寄名仍許侍養待終身之日復監肄業從之 十年二月都察院右都御史黃紱子桓乞 恩補廕

從之先是南京刑部尚書周瑄兵部尚書原傑俱有子入監天歿以其孫周伊原應韶補桓兄祀在歷未及選

用而死比二人例遂得入監

武宗正德九年二月南京吏部右侍郎楊守陞子茂深奏言臣父守陞侍從 皇上於 東宮侍讀比之吏部侍郎張元禎太常寺少卿楊時暢等俱 春宮舊臣先後各蒙廕叙遂 命茂深送監讀書 十四年六月江西廣昌縣知縣張濬奏言刑部尚書何喬新名德可錄乞 廕其子承鳳入監讀書從之 十五年六月廕大理寺卿陳恪子應期入監讀書恪未經三年考滿蓋異數也世宗嘉靖二年五月故刑部尚書董方曾孫董世臣援已故侍郎萬理孫萬濬事例奏准送監讀書 四年閏十二月故翰林侍講贈學士劉球玄孫劉弘溥奏稱父劉

祚係劉球曾孫球因直言構禍至弘治十六年伊弟劉祠陳乞已授通政司經歷司知事先臣父劉祚奏乞再廕 武宗准送監讀書嘉靖四年父劉祚中順天鄉試尚未實授 恩廕今查得正德八年 聖旨先由錄廕後中科目的還許補廕一人入監相應照例補廕奉旨劉弘溥准補廕送監讀書 七年六月已故刑部右侍郎楊茂元妻錢氏奏稱伊夫考滿病故例應廕子長男楊美珩已輸粟入監乞要將次男楊美弁承廕已准送監讀書隨有該聽選監生楊美珩奏稱弟楊美弁攬越承廕節次毆罵及楊美弁告稱兄楊美珩勒要銀兩吞占父遺田產該部奉行巡按御史提問該巡按御史

唐鳳儀隨秦楊美珩楊美弁爭廕俱各行止有碍問革但廕子乃朝廷優典似不可缺合無將本官嫡孫起送補廕從之三十一年六月巳故新建伯王守仁繼妻張氏奏稱臣夫歷任右副都御史至陞南京兵部尚書中間歷俸三年有餘累獲邊功彼時軍事倥傯未敢給由及地方平定觸冒瘴氣隨卽病故遺下三歲孤兒王正億今長成陳乞比例廕子從之三十三年七月兵部尚書聶豹以築外城効有勤勞加太子少傅廕一子入監讀書自陳本職有親男聶營吉年方二歲見有臣父嫡長孫男聶棟年一十八歲係永豐縣儒學生員相應承廕從之

太學特廕事例

太祖洪武以來品官子弟之外間有特廕若湖廣行省叅政吳雲之子徽錄爲國子生以雲死事滇南也正統巳巳北征死難諸臣旣官其長子後皆廕其次子入監成化中給事中林榮行人黃乾亨使滿刺加國沒於水以死王事亦各錄其子後乾亨子如金以廕登第復廕其孫永樂中兵部尚書陳洽死於交趾至弘治十年其會孫端甫猶得比孔鏞李昂羅通之子之例而受廕焉凡禦敵陣亡則不問其官品外內皆得議廕正德時裕州同知郁采瑞金知縣萬琛皆以死寇廕子入監然不可盡紀近若雲南左布政使徐樾死那鑑之逆

監生謝志望以帥兵拒倭没于陣皆廢子入監 內閣
 經筵及 儲闈輔導 祖宗以來屢有加廢凡特廢
 者今皆曰恩生其各處生員有能擒斬首虜許之入監
 則曰功生 正德十二年九月會昌縣報效生員文泮
 擒斬大帽山賊首從五人送監叙用 十四年十月贛
 州府學歲貢監生周尚文以擒斬賊徒報功 上命免
 其坐堂即與附選廩膳生員林思恩例下歲貢一等仍
 送監肄業 嘉靖三十三年四月廣寧中屯衛學優等
 生員唐能以斬獲虜首照有司廩膳事例題准入監
 廢官位高於父

國朝重科目一途任子多不得大位獨 燕府左長史朱

忠定公復以二品後五品終任子濬為北京刑部尚書
 二品 禮部左侍郎儀文簡公智三品任子銘至 太
 子太保兵部尚書一品 翰林院學士呂文愨公原五
 品任子憲至南京太常寺卿三品 少詹事劉文恭公
 鉉任子榮至太常寺卿掌尚寶司三品 浙江按察司
 副使陶公成四品任子魯至廣東右布政使二品 南
 京工部右侍郎黃文毅公孔昭任子綰至禮部尚書兼
 翰林學士二品 江西按察司副使許忠節公達四品
 任子瑒至錦衣衛指揮使管衛事三品 右副都御史
 孫忠烈公遂三品任子堪至都督僉事二品堪任子鈺
 至都督同知一品 品秩皆過於所自蓋奇遇也儀銘

累任翰林又以尚書掌府黃綰為詹事學士咸極清華之選而儀贈官至特進左柱國太師階勛位秩遂冠人臣陶復轉廕子孫至錦衣千戶世襲豈不充奇哉

廕子至通顯

工部尚書黎公澄廕子叔林至工部右侍郎工部左侍郎陳公孝感廕子常戶部右侍郎督倉場凡十七年少保兵部尚書于肅愍公謙廕子冕至順天府尹少師大學士徐文貞公階廕子璠少師大學士劉公吉廕子銳俱至太常寺卿三品少師大學士嚴嵩廕子世蕃至工部左侍郎加正二品服俸 太子太保兵部尚書劉莊襄公天和廕孫守有至左都督 太子太傅兵部尚書余

肅敏公子俊廕子都督同知少師吏部尚書楊襄毅公傳廕子俊卿至都督同知俱掌錦衣衛事 北京行部尚書朱公濬子紹祖廕通政司左叅議國子監祭酒宋公訥子復祖廕國子司業吏部左侍郎兼翰林院學士曹公鶴子恩廕翰林院編修 文淵閣大學士胡公廣子種尚書金公忠子達廕俱翰林院檢討達改給事中至兵科都給事中禮部尚書呂公震子熊侍郎儀公智子銘銘子泰兵部尚書劉公雋子奎陳公洽子樞吏部侍郎俞公山子誥廕俱給事中皆非常典

廕子改官例

宣宗宣德中儀侍郎智子銘以廕為給事中後改翰林檢

討進修撰再進侍讀金殿學幼孜子達以廕爲檢討後改給事中轉左右至兵科都給事中其改官可謂奇矣正德初儀侍郎進入兵部子誥以給事中避言路改檢討與金達事又相友

登 極加恩廕子例

世宗嘉靖元年楊太師廷和蔣少傅冕毛少保紀以辭伯爵費少保宏以辭廕錦衣指揮使改廕錦衣指揮千戶等官復固辭以兵部尚書彭澤言廕楊公四品在京文職蔣毛五品費七品皆世襲固辭復不許然四公迄無拜 二年太監趙山死以從龍功廕其養子雲爲錦衣指揮太監楊璉丘清死復援山例廕養子楊倫丘麒南

京守備戴義死復廕其從子戴錦戴俊太監張欽請廕養子李賢 上以爲錦衣世襲指揮本兵彭澤及科臣夏言許復禮安磐許相卿爭之不報

穆宗隆慶二年正月吏部奏原任左中允郭希賢以建言被刑乞廕子有 旨郭禹臣准送監讀書

立 中宮加 恩內閣廕子

今上萬曆六年立 中宮王氏加 恩輔臣少師張居正以守制不支祿固辭少保呂調陽進少傅尚書張四維進 太子太保俱廕一子中書舍人至七年居正服闋進太傅加歲祿百石廕一子尚寶司丞辭太傅六年以前 中宮立無加 恩故事蓋異典也

皇子生推 恩內閣司禮廕子

今上萬曆十年 皇第一子生 恭妃王氏出下 詔赦

天下尊上 仁聖慈聖徽號推 恩 慈聖父武清伯

李偉進封武清侯兄弟都指揮李文全指揮李文貴俱

陞左都督千戶李文松陞指揮使俱給應得 誥命

仁聖父固安伯陳景行歲加祿米一百石廕二子俱錦

衣衛百戶前母 莊皇后兄李鶴歲加祿米十石又

內閣輔臣張四維加少師吏部尚書 中極殿大學士

其 太子太保如故各廕一子尚寶司丞余有丁加

太子太保 文淵閣大學士其尚書如故廕一子中書

舍人俱各給應得 誥命又司禮監馮保廕弟姪都督

僉事張宏廕指揮使孫隆張鯨廕指揮僉事何進李祐

張朝廕正千戶俱錦衣衛

按 皇子生例不推 恩上徽號推 恩止 皇親而

已此異典也

冊立加 恩例

今上萬曆三十年三月以 冊立覃 恩存問大學士申

時行王錫爵王家屏各遣人奏謝奉 旨申承芳王明

虞王湛初俱與做中書舍人

邊功加 恩內閣廕子

武宗正德五年寧夏平加 恩內閣少師 太子太師吏

部尚書 華蓋殿大學士李東陽加特進左柱國仍廕

子尚寶司丞少保 太子太保吏部尚書 武英殿大學士楊廷和加少傅 太子太傅廕子中書舍人吏部尚書 文淵閣大學士劉忠加少傅 太子太傅 武英殿大學士還各賞銀壹百兩紵絲四表裏 太子少保吏部尚書 文淵閣大學士梁儲改 武英殿大學士邊功未有及 內閣者有之自茲歲始 八年以山東河南賊平 內閣大學士李東陽楊廷和梁儲費宏各廕子錦衣世襲正千戶辭乃 詔東陽兼支尚書俸廷和加少師 太子太師 華蓋殿大學士儲加少傅 太子太傅 謹身殿大學士宏加 太子太保 武英殿大學士 已上二條蓋內臣欲大有封殖而以是


節閣臣自是與軍功者幾三十年

世宗嘉靖十九年陝西大捷 詔復夏言特進光祿大夫上柱國少師 太子太師仍兼進吏部尚書 華蓋殿大學士翟鑾加少保此則夏公以忤 旨鐫秩急欲光復故也自是不已而議復河套希大封拜得罪死 三十年獲叛虜哈舟兒等輔臣嚴嵩陞子世蕃工部右侍郎仍廕一子錦衣衛千戶 東閣大學士李本進禮部尚書而撰文尚書徐階加少保廕一子入監公朱希忠加 太子太師都督陸炳加 太子太保尚書孫承恩加 太子少保此則贊玄例也 三十三年以拒虜功輔臣嚴嵩廕子尚寶司丞徐階李本廕子中書舍人而

伯陶仲文增祿百石公朱希忠都督陸炳增祿五十石
方承裕 太子太保亦贊玄例也自是復不與邊功將
二十年

穆宗隆慶元年七月少保兼 太子太保吏部尚書楊博
九年秩滿 上遣中官 賜羊酒寶鈔於私第仍 諭
曰博性資忠亮才猷敏達典兵掌銓茂著勞績其加少
傅兼 太子太傅廕一子為國子生博疏辭至再聽免
廕子餘不允辭 又以遼左功輔臣高拱加柱國 中
極殿大學士張居正加少師兼 太子太師俱廕一子
錦衣衛千戶殷士儋加少保與原輔臣趙貞吉俱廕子
中書舍人 四年冬十二月北虜俺荅執逆賊趙全等

九人來獻總督宣大都御史王崇古以聞 詔全等伏
誅有 旨虜執叛效順內外諸臣運謀宣力功委可嘉
王崇古加 太子少保兵部尚書兼都察院左副都御
史廕一子錦衣衛正千戶世襲還賞銀五十兩大紅紵
絲蟒衣一襲方逢時陞兵部左侍郎兼右僉都御史廕
一子錦衣衛百戶世襲賞銀三十兩大紅飛魚紵絲一
襲郭乾加 太子少保廕一子入監讀書賞銀三十兩
大紅紵絲二表裡谷中虛王遴各陞俸一級賞銀二十
兩一表裡取方即申李次十兩吳拘等各五兩兵科都
給事中章甫端陞俸一級賞銀十兩其餘的五兩已而
吏部奉 聖諭獻俘禮成 內閣輔臣殫忠運謀勞績



可加茲特加 恩李春芳加吏部尚書俸進 中極殿
大學士餘官如故高拱加少傅兼 建極殿大學士
太子太傅尚書如故各廕一子尚寶司司丞殷士儋加
少保 武英殿大學士 太子太保尚書如故并原任
大學士趙貞吉俱廕一子中書舍人已而兵部又奉
聖諭司禮監太監陳洪等日侍左右效有勤勞陳洪馮
保加 恩二等廕弟姪一人與做錦衣衛世襲正千戶
曹憲王璠孟冲加 恩一等廕弟姪一人做錦衣衛世
襲百戶

按全等中國人也逃入虜為嚮導後俺荅有孫曰把都
那弟為我所獲俺荅日夜思復其孫乃以全等送還之

遂遣回把都那弟云

今上萬曆初年數以遼東戰功輔臣張居正呂調陽張四
維加廕賞從厚最後居正遂自太傅進太師子錦衣衛
指揮僉事懋修陞同知世襲仍歲加祿米百石張四維
加兼 太子太師廕子錦衣所鎮撫世襲申時行加
太子太保蓋極 恩也 十九年正月初七日吏部文
書房傳 旨茲進 累朝訓錄 內閣輔臣效有勤勞
元輔申時行加太師仍廕一子中書舍人次輔王錫爵
加少傅王家屏加 太子少保俱各餘官如故各給應
得 誥命如 勅奉行 二十二年二月吏部接 聖
諭茲纂修 玉牒書成 內閣輔臣兼總裁効有勤勞

茲特加 恩元輔王錫爵加少傅兼 太子太保吏部
尚書進 建極殿大學士還廕一子與做中書舍人次
輔趙志臯加少保兼 太子太保戶部尚書張位加大
學士各廕子入監讀書各給應得 誥命如 勅奉行
次日俱奏辭免非常 恩命奉 旨特允 二十四
年二月吏部接出 勅甘鎮大獲奇捷朕心嘉悅 內
閣輔臣殫力運籌忠勲茂著茲特加 恩 太子太保
禮部尚書兼 文淵閣大學士趙志臯加少保改吏部
尚書兼 武英殿大學士還廕一子與做尚寶司司丞
禮部尚書 文淵閣大學士張位加 太子太傅改戶
部尚書大學士如故廕一子中書舍人禮部尚書 東

閣大學士陳于陞沈一貫各加 太子少保兼 文淵
閣大學士如故廕一子入監讀書都照新銜給與應得
誥命如 勅奉行 八月吏部奏給由事大學士陳
于陞考滿奉 旨陳于陞簡任密勿協贊忠誠茲當考
滿勞績茂著着便復職加 太子太保餘官如故廕一
子入監讀書照新銜給與 誥命 十九年兵部奏寧
夏叛逆蕩平奉 旨傳諭吏部哮賊據城勾虜叛亂勢
甚猖獗該文武將吏運籌效勞勦除克逆平定邊疆朕
心嘉悅葉慶熊謀畧素定成功一朝勲庸茂著升都察
院右都御史廕一子錦衣衛正千戶世襲賞銀一百兩
大紅紵絲四表裡朱正色陞右副都御史廕一子錦衣衛

實授百戶世襲賞銀八十兩彩段四表裡梅國禎陞四品京堂候邊方巡撫推用廕一子錦衣衛實授百戶賞銀五十兩彩段二表裡李如松陞右都督廕一子錦衣衛指揮同知世襲賞銀一百兩大紅紵絲四表裡仍加太子少保以示酬眷蕭如薰陞署都督同知廕一子錦衣衛指揮僉事世襲賞銀八十兩大紅紵絲四表裡常居敬賞銀四十兩彩段二表裡沈思孝姚繼可等俱加叙錄沈思孝急爲起用麻貴加署都督管事候冲邊大將員缺推用劉承嗣准復副總兵李如樟陞叅將遇缺加副總兵推用楊文陞副總兵仍加實職一級來保陞副總兵仍加署都督僉事吳顯陞叅將王通加實職

二級董一奎准叙用張傑蕭如蘭遇大將員缺推用麻貴劉承嗣來保李如樟馬孔英楊文李寧等仍各賞銀四十兩彩段二表裡其餘各賞銀二十兩周國柱陞都指揮使世襲指揮僉事加副總兵仍賞銀五十兩紵絲二表裡王英陞指揮世襲石棟陞正千戶世襲仍各賞銀二十兩魏學魯事功多准復原官致仕石星居中調度功勞崇懋加太子太保廕一子錦衣衛正千戶賞銀八十兩大紅紵絲四表裡徐元太趙參魯宋應昌各賞銀三十兩紵絲二表裡楊俊民賞銀三十兩紵絲二表裡許弘綱賞銀二十兩遇京堂缺推用其餘效勞官員陞職賞賚有差該部酌量題請二十二年正月

吏部覆尚書吳文華奏改廕次男承詔奉 旨准改

吏部奏原任尚書張瀚贈官奉 旨贈 太子太保廕

一子入監讀書 十月兵部奏其鎮海虜犯邊官軍堵

截戰歿奉 旨謝詔准贈都督僉事另廕一子正千戶

馬載圖贈指揮僉事應繼兒男於祖職上加陞副千戶

各世襲仍於本鎮立祠致祭 二十三年三月兵部覆

御史朱鳳翔本奉 旨于謙有安社稷之功原廕指揮

同知着陞都指揮使改註錦衣衛胡宗憲原廕錦衣衛

副千戶着陞指揮僉事各世襲胡宗憲還與他謚 吏

部覆陝西巡撫呂鳴珂本奉 旨盛訥准贈禮部尚書

還廕一子入監讀書 二十四年四月吏部奏兵部侍

郎邢玠廕子奉 旨邢從言准送監讀書 七月吏部

奏原任大學士高儀廕孫男高嗣文補廕有 旨准廕

閏八月吏部奏覆陝西巡撫賈待問廕子奉 旨賈

同芳准送監讀書 九月吏部奏南京戶部侍郎陳渠

廕子陳肯學刑部侍郎朱鴻謨廕子朱仲鉉奉 旨俱

准送監讀書 十月吏部覆南京刑部謝杰廕子奉

旨謝汝璿准送監讀書 楊一魁加 太子少保廕一

子入監讀書奉 旨河工告成有裨漕務朕心嘉悅合

宜升賞以酬勛 二十七年九月兵部欽奉 聖諭倭

奴七年犯順再危朝鮮藉 廟社鴻休文武協力克收


全捷宜叙慶典這水陸四路功次既已勘明議妥邢玠

加 太子太保照舊尚書總督廕一子錦衣衛指揮僉
事世襲賞銀八十兩大紅紵絲蟒衣一襲給與應得
誥命張眷蒙廕一子入監讀書賞銀六十兩大紅紵絲
四表裡萬世德升右副都御史照舊經理廕一子入監
讀書賞銀五十兩大紅紵絲三表裡陳璘陞實授都督
同知廕一子本衛指揮僉事世襲賞銀六十兩大紅紵
絲四表裡劉綎陞署都督同知廕一子本衛正千戶世
襲麻貴陞右都督廕一子本衛正千戶世襲仍各賞銀
五十兩大紅紵絲三表裡董一元准復原職賞銀四十
兩紵絲二表裡王士琦梁祖齡董漢儒各陞職二級賞
銀二十兩王士琦梁祖齡還需大用周一梧楊恩王修

行各陞俸一級賞銀十五兩戴延春等十三員各賞銀
二十兩葉邦榮等十四員各賞銀十二兩楊蔗等一百
十八員各八兩孫堂等一百九十五員各五兩戴延春
以下及祖承訓等俱各准陞授錄用贈卹李舜臣行彼
國從優旌卹胡良璽等十二員各賞銀十兩王應民等
各八兩史銘等各八兩餘依擬自決戰以來蕭大亨父
搆兵樞勞多績著各官共效勞勛皆宜報酬蕭大亨着
復原職尚書如故仍賞銀六十兩大紅紵絲蟒衣一襲
李楨遇缺起用楊俊民贈 太子太傅陳渠賞銀六十
兩大紅紵絲四表裡給與應得 誥命卿樂廕一子入
監讀書給授助階賞銀八十兩大紅蟒衣一襲兵科都

給事中張輔之着於四品京堂內用賞銀十五兩徐觀
瀾着吏部優錄楊應文陞都給事中與徐觀瀾俱各賞
銀十五兩職方司郎中楊應聘陞京堂用賞銀十五兩
其餘各十兩石星通倭釀患賣國損威曹學程食祿忘
君保身尸位如何擅引魏學會舊例市恩姑且不究
都照舊監候處決許守恩蕭應宮本宜重處姑着發烟
瘴地面未遠克軍遇赦不宥又 諭東事收功各督撫
鎮道共效勞績慶典宜普楮鈇等十八員各賞銀三十
兩紵絲二表裡內王世揚陞兵部尚書李頤陞右都御
史俱照舊管事汪應蛟梅國楨王象乾劉元霖李植各
陞俸一級尹應元給與應得 誥命韓子濂等二十三

員各賞銀十二兩王猷吉等八員各八兩其陞職復俸
等項俱依擬又 諭朝鮮之時賴有稷山青山二戰挫
賊銳鋒及至蔚山斬馘甚勝雖煩再舉今已收功俱宜
叙錄既勘議及併叙明白麻貴免議楊位丁應泰各賞
銀十五兩陳登十兩茅國噐陳寅彭友德各十五兩陳
遇文等八員各十兩胡仰化五兩各官陞後錄贈提問
革職等項悉俱依擬楊鎬係聽勘官今科臣既已勘明
功罪自不相掩着吏部從公議處來說又 諭楊鎬用
兵雖有損失但王京垂亡之時能單騎赴敵力戰存國
功亦難民既公論已定准以原官叙用又 諭東倭蕩
平大獲奇捷 內閣輔臣運籌帷幄勞績可嘉茲特加



恩示酬元輔志臯加兼 太子太師進 中極殿大
學士廕一子與做尚寶司司丞還賞銀八十兩彩段四
表裡次輔一貫加少保改吏部尚書廕一子與做中書
舍人還賞銀七十兩彩段四表裡各餘官如故都照新
銜給與應得 誥命如 勅奉行

異途加 恩廕子例

金忠初名世忠鄞縣人精于卜居地名韓嶺洪武中同
邑袁廷玉以相名一日過縣前見一婦人乳女于傍廊
下哭聲悽甚廷玉就詢之婦人告曰夫當戍趙州今在
酒肆旗軍飲畢即行矣言既復哭之悲袁心憐之往見
其夫夫曰我韓嶺金世忠也居以卜課度日今缺戍爲

族人賂旗軍以我代行袁相其面曰此尚書骨法也他
日當大貴此行勿憂因代償其酒值又貸米二斗贈之
別告之曰登舟即順境他日富貴無相忘既而舟泊西
渡共濟者病腹痛金與之卜言宜用衣帶刮咽喉下即
愈如其言果瘥驚以爲神因厚謝之以故旅資遂不匱
至戍所開卜肆以奇驗聞于 燕邸召至問以靖難卜
云吉遂署爲紀善侍帷幄用其謀有成後官兵部尚書
永樂三年 皇太子正位東宮 命兼詹事府事尋卒
洪熙元年贈少師謚忠襄子達年十歲授檢討還鄉支
俸以幼童廕官自此始

蒯祥蘇州人木工也父福能永樂中主大營繕以老告

退祥代之丁酉扈從往北凡 宮殿廟社皆從事 正
統中重作 三殿及文武諸衙門勞尤多 天順未奉
命作 裕陵 成化間自營繕所丞進所副陟營繕
司主事員外郎歷太僕寺少卿晉工部右侍郎轉左食
一品俸成化辛丑三月卒年八十四得 贈及祖父母
廕其子爲錦衣衛千戶又廕國子生
徐杲楊州人亦木工嘉靖末脩玄教屢興改 宮殿杲
多著力極膺榮寵累官至工部尚書又官其子爲錦衣
衛百戶尋奏言願以所積賞銀自豎尚書牌坊許之隆
慶初爲言官論劾籍其家奪官毀坊視祥之祿壽不及
遠矣

駙馬都尉裔孫入監讀書者李琦孫植成化二十三年
送監尹清孫衡弘治十年送監沐昕曾孫居弘治十一
年送監右皆乞 恩得 旨嗣後 兩宮徽號 詔赦
內有錄用一條不可勝紀

聖夫人劉氏男季通天順八年送翰林院習字授中
書舍人累陞太僕寺少卿 恭聖夫人男胡恭成化二
年送中書習字授中書舍人累陞尚寶司卿

世宗嘉靖甲子 命太監黃錦廕弟姪一人錦衣衛百戶
是年秋八月以 洪壇大素二殿成工部具奏乞 恩
上悅 命太監王錫廕弟姪一人太監張琮賈胤各
廕弟姪一人錦衣所鎮撫工部尚書雷禮廕一子入監

讀書 太監王鼎等往視工報完又大慶賞王廕弟姪
一人

穆宗隆慶元年春正月內官監太監李芳以侍 藩府推
恩廕子芳懇辭 上以芳久侍左右著忠勤特茲錄
廕以示酬獎不淮辭

補廕事例

世宗嘉靖中補廕原任南京光祿寺卿楊維聰男楊文禕
送國子監讀書維聰子三人次文祈中順天鄉試先是
嘉靖十八年遇 恩例兩京官三品以上俱廕一子維
聰已廕長子文祥送監讀書轉吏部附選至嘉靖二十
四年未仕病故至是 上即位其第三子文禕遂援嘉

靖四十五年五月內有原任兵部尚書趙廷瑞以 恩
例廕弟趙廷璋未任病故補廕男趙岳生原任兵部侍
郎張衍慶以 恩例廕男張樸未任病故補廕次男張
槩比例陳乞許之

童科

宋譚中立茶陵人應童子科仕至吏部侍郎文章治行爲
時所推重 譚昭實茶陵人五歲能讀五經知爲文辭
七歲應童子科中上第 陸德輿崇德人由童子登科
官至吏部尚書 張伯淳崇德人少舉童子科後舉進
士 胡穎湘潭人幼機警中童子科紹定間登進士第
浙江宋時以神童舉者嘉興自陸德輿張伯淳而外

有徐聞詩台州有余滾傳元英葉斗南陳處益牟松壽
謝斯立詹檜龍楊說孫應獮李仕龍陳棟沈培陳用亨
李志式鄭寅戴顏老何亨復衢州有呂嗣興嚴州有邵
煥温州有薛元禮潘起予嚴覲陳逢吉應節嚴胡芳林
普胡芴項公澤沈燔吳道願元薛元德郭孔疇謝子雲
鄭友禮處州有田介孫田晉孫田仲和季申臯陳嘉猷
潘景俞而鄞縣之汪洙慈谿之姚正子則未及焉 福
建宋時登童子科者乾道三年高應何邁寧德人淳熙
二年何樞寧德人何致遠羅源人七年林公洽長樂人
何擢德安人

金有經童之制凡士庶子年十三以下能誦二大經三小


經又誦論語諸子五千字以上府試十五題通十三以
上會試每場十五題三場共通四十一以上為中選所
貴在幼而誦多者若年同則以誦大經多者為最

太宗天會八年東平童子劉天驥七歲能誦詩書易禮春
秋左傳及論語孟子上命教養之

熙宗皇統十五年詔闢童子舉取至百二十二人 海陵
天德時以童子無益詔廢之

世宗大定二十九年章宗初即位上謂宰臣曰經童豈遽無人
其議復置

章宗明昌元年益都府申童子劉住兒年十一歲能詩賦
誦大小六經所書行草頗有法孝行夙成乞依宋童子



李淑賜出身且加以恩詔上召至內殿試鳳凰來儀賦
魚在藻詩又令賦旱詩上嘉之賜本科出身給錢粟官
舍令肄業太學 三年平章政事完顏守貞言經童之
科非古也自唐諸道表薦或取五人至十人近代宋仁
宗以爲無補罷之本朝皇統間取及五十人因以爲常
天德時復廢聖主復置取以百數恐久積多不勝銓擬
乞諭旨約數取之上曰若所誦皆及格何如守貞曰視
最幼而誦不訛者精選之則數亦不多也復問參知政
事胥持國對曰所誦通否易見豈容有濫上曰限以三
十或四十人若百人皆通亦可覆取其精者持國曰是
科蓋資教之術耳夫幼習其文長玩其義使之蒞政人

才出焉如中選者加之修習進士舉業則所記皆得爲
用臣謂可勿令遽登仕途必習舉業而後官之可也若
能擢進士第自同進士任用如中府薦會試視其次數
優其等級幾舉不得薦者從本科出身又可以激勸而
後得人矣詔議行之 五年勅神童三次終場同進士
恩榜遷轉兩次終場全免差使第六任與縣令依本路
遷官如一次終場初入仕則除一差其餘並依本門戶
仍使應三舉然後入仕每舉放四十人 明昌後稱神
童者五人太原常漆壽四歲能作詩劉滋劉微張漢臣
後皆無聞獨易州麻九疇三歲識字七歲能草書作大
書後能樹立趙秉文以徵君目之而不名又張元素字

潔古易州人八歲試童子舉

元

成宗大德三年舉童子楊山童海童 五年大都提舉學校所舉安西路張秦山江浙行省薦舉張昇甫

武宗至大元年舉武福安

仁宗延祐三年江浙行省舉錢傳孫馮帖哥 六年河南

路舉張荅罕學士完者不花舉丁頑頑 七年河間縣

舉杜山童大興縣舉陳昞

英宗至治元年福州路連江縣舉陳元麟 三年河南行

省舉張英

泰定帝泰定四年福州舉葉畚畊

文宗天曆二年舉杜夙靈 至順二年制舉荅不歹子買來的

已上皆以其天資穎悟超出兒童或能默誦經文書寫大字或能綴緝辭章解說經史並令入國學教育之惟成宗時張泰山尤精篆籀英宗時陳元麟能通性理泰定時葉畚畊問以四書大義對曰無過事父母能竭其力事君能致其身時人以遠大期之 袁濬通豐縣人年六歲能誦五經以神童薦 安滔九歲以經童登第 陰幼遇奉新人八歲中九經科

皇明

國朝科目不設童科間有以神童薦者 召至親試或留

中講讀或遣歸就舉今具于後

洪鍾錢塘人四歲以善大書舉入翰林肄業後舉進士官舍人

李東陽長沙人五歲以奇童舉 景帝召試大書屬對

喜甚 詔入京府學肄業中天順甲申進士第一官少

師 華蓋殿大學士謚文正

程敏政休寧人程襄敏信長子年八歲隨父大叅入蜀

撫臣以神童薦 英宗試 聖節及瑞雪詩并經義各

一篇援筆立就 上六喜 詔讀書翰林院官給廩饌

踰冠舉進士第二官禮部右侍郎

楊一清雲南人寓京口十歲有司以奇童舉登弘治庚

戊第官少師 殿閣學士

董玘浙江會稽人弘治中玘父自舉奇童試不中格令

罷歸十八年登第嘉靖初官吏侍

楊廷和新都人十二歲中舉後官至大學士

任道遜舉奇童侍 東宮書登成化戊戌進士官少師

殿閣學士

朱奎以幼童薦官大理卿直 內閣

林章以幼童薦直 內閣官太常寺卿進階從一品

謝宇以幼童薦直 內閣官工部左侍郎



内閣守工部式部卿

内閣守太常寺卿兼御史大夫

内閣守大理卿

内閣守

内閣守太僕卿

内閣守兵部卿

内閣守刑部卿

内閣守工部卿

内閣守礼部卿

